

DEVOZION

Fe e unità per i ladins

A Poza l é stat onorà Sèn Giosef Freinademetz prean sia interzescion acioche l popul ladin posse ruèr endò dut adum e jir inant te la solidarietà cristiana

Ence te Fascia l Sènt ladin Giosef Freinademetz l é cognosciù e onorà. L grop miscionarie de Pera à cernù de tor su so inom e te gejia de Poza l é n basrelief con sie retrat. Apede chest da 5 egn en ca a Poza l é conservà ence na reliquia del Sènt, «ex arca sepulchralis», n picol toch de legn del vascel del miscionarie badiot mort del 1908 e sepoli te la Cina, olache l'aea volù restèr fin en ultima, cineis anter i cineisc. L tochet de legn del vascel é stat metù te na crousc che é stata fissèda te n bloch de legn che à la foja di crepes del Grop del Sela. L é n don prezios che l piscop emerit Luigi Bressan aea ciapà da Siur Pire Irsara e che l à volù dapò ge donèr a la comunanza de Fascia, conscidran la venerazion de noscia val per chest prum Sènt ladin.

En vender ai 27 de jené chesta reliquia era su utèr te gejia de Poza en ocajon de na zelebrazion en onor de S. Freinademetz, e japede utèr l era ence n chèder del Sènt fat dal president de l'Union di Ladins de Fascia Fernando Brunel.

Te la bela messa, ciantèda adum dai cores de la parochies de Poza, Pera Vich e Soraga, don Andrea Malfatti à rejonà de la vita e de l'ejempie del Sènt ladin, che à sapù se fèr ite con umiltà e amor tel popul cineisc.

Don Andrea à recordà ence l cedean da la spartijon di ladins voluda dal fascism e l'aspirazion a l'unità de nosc popul, domanan l'interzescion de Freinademetz acioche i ladins posse ruèr endò duc adum e i posse jir inant te la solidarietà cristiana; la fe e l'unità de noscia comunanzes é states domanèdes ence te la orazions del orazional ladin per Sèn Giosef Freinademetz.

L Sènt ladin é stat recordà ence la sera do, en sabeda ai 28, tel cedean de sia mort, te la zelebrazion prefestiva che i ciantores del Cor di joegn de Poza à viventà con la bela cianties per ladin che i aea abù ocajon de portèr dant l uton passà al pelegrinaje ladin a Oies. 16



La reliquia e l chèder de Sèn Giosef Freinademetz te gejia de Poza.